

醫方類聚卷之十四

諸風門二

治病百法

風

夫風者厥陰風木之主也諸風掉眩風痰風  
 厥涎潮不利半身不隨失音不語留飲食泄  
 痰實嘔逆旋運口喎搐搦僵仆目眩小兒驚  
 悸狂妄胃脘當心而痛上支兩肋咽膈不通  
 偏正頭痛首風沐風手足攣急肝木為病人



氣在頭

防風痛聖散 防風天麻散 防風湯

祛風丸 排風湯 小續命湯 消風散

夫風中失音悶亂喎斜口眼內經曰風之爲病善行而數變故百病皆生於風也可用三聖散吐之如不省人事牙關緊閉粥菜不能下者煎三聖散鼻內嚙之吐出涎口自開也次服通聖散涼膈散大人參半夏丸桂苓甘露散等大忌雞猪魚兔酒醋蕎麥動風引痰

之物

頭風眩運手足時復麻痺胃脘發痛心腹滿悶按之如水聲可用獨聖散吐之吐訖可服辛涼清上之藥仲景曰此寒痰結於胃中之致然也  
十形三療 風形

因驚風搐

新寒馬叟年五十九因秋欠稅官杖六十得驚氣戒風搐已三年矣病大發則手足顛掉

不能持物食則令人代哺口日張腭唇舌嚼爛抖擻之狀如線引傀儡每發市人皆聚觀夜間發熱衣被盡褰遍身燥痒中熱而反外寒久欲自盡手不能繩傾產求醫至破其家而病益堅叟之子邑中舊小吏也以父病訊戴人戴人曰此病甚易治若隆暑時不過一涌再涌奪則愈矣今已秋寒可三之如未更刺膺穴必愈先以通聖散汗之繼服涌劑出痰一二升至晚又下五七行其疾小愈待五

日再一涌出痰三四升如雞黃成塊熱如湯然叟以手顫不能自探妻與代探咽嗑腫傷昏憤如醉約一二時許稍稍省又下數行立覺足輕顫減熱亦不作足亦能步手能巾櫛自持匙筋未至三涌病去如濯病後但覺極寒載人曰當以食補之久則自退蓋大疾之去衛氣故宜以散風導氣之藥和不可以熱劑溫之恐反成他病也

風搖反張

呂君玉之妻年三十餘病風搐目眩角弓反  
張數日不食諸醫皆作驚風暗風風癩治之  
以天南星雄黃天麻烏附用之殊無少効戴  
人曰諸風掉眩皆屬肝木曲直動搖風之用  
也陽主動陰主靜由火盛制金金衰不能平  
木肝木茂而自病先涌風痰二三升次以寒  
劑下十餘行又以鉞鍼刺百會穴出血二盃  
立愈

因風鼻塞

常仲明常於炎暑時風快處披露肌膚以求  
爽爲風所賊三日鼻塞雖坐於暖處少通終  
不大解戴人使服通聖散入生薑葱根豆豉  
同煎三兩服大發汗鼻立通

癩

朱葛解家病癩疾求治于戴人戴人辭之待  
五六月間可治之時也今春初尙寒未可服  
藥我已具行裝到宛丘待五六月製藥來解  
家以爲託辭後戴人果以六月間到朱葛乃

具大蒜浮萍等藥使人召解家曰藥已成矣  
可來就治解爲他醫所惑竟不至戴人曰向  
日我非託也以春寒未可發汗暑月易發汗  
內經論治癩鍼二百日眉毛再生針同發汗  
也但無藥者用針一汗可抵千針故高供奉  
採萍歌曰不居山兮不在岸採我之時七月  
半選甚癰風與癩風些小微風都不筭豆淋  
酒內下三九鐵幘頭上也出汗噫文士相輕  
醫氏相疾文士不過自損醫氏至於害人其

解家之謂與陽夏張主簿病癩十餘年眉鬚  
皆落皮膚皴澁如樹皮戴人斷之曰足有汗  
者可治之當大發汗其汗出當臭其涎當腥  
乃置煖室中徧塞風隙以三聖散吐之汗出  
周身如臥水中其汗果粘臭不可聞痰皆腥  
如魚涎兩足心微有汗次以舟車丸濬川散  
大下五化行如此數次乃瘳

腎風

桑惠民病風面黑色畏風不敢出爬搔不已

眉毛脫落作癩醫三年一日戴人到棠谿來求治于戴人戴人曰非癩也乃出素問風論曰腎風之狀多汗惡風脊痛不能正立其色焔面痿然浮腫今公之病腎風也宜先刺其面大出血其血當如墨色三刺血變色矣於是下針自額上下排鍼直至顙頂皆出血果如墨色偏腫處皆鍼之惟不鍼目銳眥外兩旁蓋少陽經此少血多氣也隔日又鍼之血色乃紫二日外又刺其血色變赤初鍼時痒

再刺則額覺痛三刺其痛不可任蓋邪退而然也待二十餘日又輕刺一遍方已每刺必以冰水洗其面血十日黑色退一月面稍赤三月乃紅白但不服除下熱之藥病再作戴人在東方無能治者

勞風

戴人見一男子目下腫如臥蠶狀戴人曰目之下陰也冰亦陰也腎以爲水之主其腫至于目下故也此由房室交接之時勞汗遇風

風入皮腠得寒則閉風不能出與水俱行故病如是不禁房則死

### 中風

高評事中風稍緩張令涌之後服鐵彈丸在普濟加減方中或問張曰君常笑人中風服鐵彈丸今以用之何也張曰此收後之藥也令人用之於大勢方來之時正猶蚘蟬撼大樹不識次第故也

### 治方雜論

## 風

人之生也負陰而抱陽人居一氣道在其中矣外有八邪之相盪內有喜怒之交侵真氣內弱風邪襲之風之傷人或爲寒熱或爲疼痛或爲偏枯或爲拘攣其候不一風者善行而數變此乃風者百病之始萬病之長也蓋內不得通外不得泄此謂之病生於變亂也或失音而昏冒或口目而喎斜可用二聖散吐之或不知人事者或牙關緊急者粥不能

下不能咽者煎三聖散鼻內灌之吐出涎沫  
口自開也次服無憂散通解九通聖涼鬲人  
參半夏丸桂苓甘露散消風散熱除濕潤養  
液之寒藥排而用之切忌雞猪魚兔油膩酒  
醋蕎麩動風之物及引痰之食

大凡頭風眩運手足麻痺胃腕發痛心酸滿  
悶按之有聲皆因風風寒濕三氣雜至合而  
爲痺也在上謂之停飲可用獨聖散吐之吐  
訖後服清上辛涼之藥通聖加半夏之味仲

景云此痰結胃中而致也

大凡人病雷頭懶于俗呼之謬名也頭痛昏  
眩皆因浴髮而得之卽爲首風此因邪風在  
於胃中熱甚化而爲痰之所致也可以茶調  
散吐之吐訖次用藏用丸下之後可服烏荊  
丸若是雷頭者上部多有赤腫結核或面血  
無汗經云火蔚發之開導之却之可用銍鍼  
出血則愈靈樞經云奪血者無汗奪汗者無  
血血汗俱蕩豈不妙哉衰老者可用涼膈解

毒消風散熱爲治年壯者可以蕩滌積熱大黃牽牛氣血宣通使無壅滯而愈

凡人患目腫經年不差俗言頭風所注更加頭痛者豈非頭風者歟此乃足厥陰肝之經手少陰心之經兼五藏俱有大熱也可先用通解丸通利大小便大黃越桃飲子治肝熱者菴活次明散服之大有神効矣

澹寮方

中風

夫人之冒風輕則爲傷重則爲中中之重者鮮有不斃蓋入臟則難愈入腑則猶可治之也且風性緊暴善行數變其中人也卒其眩人也暈激人涎潮昏人神亂故推爲百病長太醫編集亦首論中風所謂左癱右瘓者乃邪氣中人邪氣反緩正氣卽急正氣引邪喎僻不隨入風懿者以心肺隔閉不能言但噫噫作聲蓋肺氣入心則能言邪中心肺涎潮昏塞故使然也四肢緩縱爲風痲者以風散

涎注於關節氣不能行故使四肢不遂也舌強不能言者以風入心脾經所致心之別脉繫舌本脾之脉絡胃俠咽連舌本散舌下風涎入其經絡故舌不轉而不能言也四肢拘攣者以風冷之氣入于肝臟使諸筋攣急屈而不能伸也風柔者以風熱之氣入于肝臟使諸筋弛張緩而不可收也故經云寒則攣急熱則弛張風顛者風邪入於肝臟經絡上氣不守正位故使頭招搖而手足顛掉也風

瘖者以風冷之氣客於中滯而不能發故使口噤不能言也與前所謂涎潮心肺同候但此以口噤爲差耳猥退風者半身不遂失音不語臨事不前亦偏中於心肺經所致也中風之證大略如此况四氣皆能中人變證尤多中之者亦多由氣不順治之之法更當兼理其氣各隨輕重以處方方之可用者集于茲焉

凡中疾一時諸證蜂起則爲困篤倉卒之間

藥不可入名醫多用蘇合香圓擦起牙關或以生半夏皂角末吹鼻竅或灌陳霜梅汁收其痰或服真麻油調麝香以疏通其氣又或用麝香煎五積散爲之兼行要藥倘或不然殆至風氣日增不得安愈

男子婦人中風涎潮於心卒然中倒當卽時扶入煖室中扶策正坐當面作好醋炭熏之令醋氣衝入口鼻內良久其涎潮聚於心者自收歸舊輕者卽時甦省重者亦省人事惟

不可喫一滴水湯入喉也如喫湯水則其涎永繫於心絡不能去必成廢人今只以醋炭熏之旣得涎離於心漸漸甦省當以生料五積散加麝香煎服之

傳心方

積年痰飲漸成風口眼喎斜語不通蘇合薑汁調半盞青州圓子有神功 久年痰飲停滯胃膈忽然痰涎壅盛手足頑麻口眼喎斜語言不正用局方麝香蘇合香圓三粒生薑汁調開送下青州白圓子五十粒如不能吞

將白圓子研細灌下爲妙

温氏隱居方

中風氣逆有痰涎蘇合薑調灌下咽次用省風小續命多增木麝二香煎往往中風之證多因喜怒不常或飲食停滯或怒氣傷神思慮過多損於心臟用局方蘇合香元三圓生薑自然汁化開灌下咽喉次用局方省風湯小續命湯各加麝香本香依法煎服同上風中須將氣飲詳薑煎蘇合橘皮湯省風續命徐徐進二藥仍須入木香中風之證多因

心腎虧虛喜怒不常或強食停飲或怒氣傷神過慮損心之所致也先用局方蘇合香元薑汁調數元分爲三服却用橘皮湯點服次服省風湯小續命湯加木香依法煎同上

口眼喎斜是中風筋疼煩熱遍身中急煎五七加芍藥蘇合香元速有功風寒濕氣流於經絡忽然手足頑麻口眼喎斜項強筋疼遍身煩熱未可使用風藥宜煎局方三五七散加芍藥三錢用水三盞生薑十片煎至一盞

半去滓作三次調蘇合香元三圓服留滓再煎同上

凡中疾口開手散眼合遺尿鼻聲如鼾睡俱爲難治蓋口開者心氣閉絕也遺尿者腎氣閉絕也手散者脾氣閉絕也眼合者肝氣閉絕也鼻鼾者肺氣閉絕也備此五證尤不可治五證中纔見一證猶當審餘證以救療蓋以初中則眼合者多痰上則鼻鼾者亦多惟是遺尿口開二證俱見爲惡心爲五臟主君

腎爲一身根本誠不可閉絕也

凡人中風脈無不大者非熱也是風脈也中風有冷熱陽病則熱陰病則冷冷則用溫風藥熱則涼風藥不可一槩用也凡中風皆不可吐出涎人骨節中皆有涎所以轉動滑利中風則涎上潮咽喉中袞響以藥壓下涎冉歸骨節可也不可吐若吐出涎時間快意非久枯了人手足不可不戒也小兒驚風亦不可吐出涎其患與大人同方其發搐搦之

時不可捉住手足捉住則涎不歸手足當不  
隨但寬鬆抱之可也醫餘

凡中風用續命排風風引竹瀝諸湯及神情  
丹茵芋酒之類更加以艾無不愈者然此疾  
積習之久非一日所能致皆大劑久而取効  
唐書載王太后中風暗默不語鑿者蒸黃芪  
數斛以熏之得差蓋此類也今人服三五盞  
便求効責鑿也亦速矣孟子曰七年之病三  
年之艾久而後知爾本事方

世傳左爲癱右爲瘓此說尤非何者經既有  
偏中半身不遂之候卽癱瘓之候當以左右  
俱中者名之又說以春夏得之難治秋冬得  
之易療春夏者陽氣上騰火力方盛風火相  
得而旺故難治也秋冬者陽氣降下漸微卽  
易療也此說亦未可必惟其中之淺深爲難  
易爾治法兼理肝腎爲得蓋肝主筋腎主骨  
風中肝腎則筋骨癱瘓也雞峯方  
風淫末疾謂四肢凡人中風悉歸手足故也

而疾勢有輕重故病輕者俗名小中一老鑿  
常論小中不須深治但服溫平湯劑正氣逐  
濕痺使毒流一邊餘苦不作隨性將養雖未  
能爲全人然尙可苟延歲月若力攻之縱有  
平復者往往恬不之戒病一再來則難以支  
吾矣譬如捕寇拘于一室則不使之逸越自  
無他慮或逐之再至則其禍當劇於前矣此  
語極有理而每見世之病者大體皆如是但  
常人之情以幻質爲已有豈有得疾爲廢人

而不力治者此未易以筆舌喻也

泊宅編

衛生寶鑑

中風論

經曰風者百病之始善行而數變行者動也  
風本爲熱熱勝則風動宜以靜勝其躁是養  
血也治須少汗亦宜少下多汗則虛其衛多  
下則損其榮汗下各得其宜然後宜治其在  
經雖有汗下之戒而有中臟中腑之分中腑  
者宜汗之中臟者宜下之此雖合汗下亦不

可過也仲景云汗多則亡陽下多則亡陰亡陽則損氣亡陰則損形故經言血氣者人之神不可不謹養也初謂表裏不和須汗下之表裏已和是宜治之在經也其中腑者面顏顯五色有表證而脉浮惡風惡寒拘急不仁或中身之後或中身之前或中身之側皆曰中腑也其病多易治其中臟者唇吻不收舌不轉而失音鼻不知香臭耳聾而眼瞶大小便秘結皆曰中臟也其病則難治經曰六府

不和留結爲癰五臟不和九竅不通外無留結爲癰內無九竅不通知必在經也初證既定宜以大藥養之當須按時令而調陰陽安臟腑而和榮衛少有不愈者也風中腑者先以加減續命湯隨證發其表如無中臟則大便多秘證宜以三化湯通其滯表裏證已定別無變端故以大藥和而治之太抵中腑者多著四肢中臟者多滯九竅雖中腑者多兼中臟之證至於舌強失音久服大藥能自愈

也有中風濕者夏月多有之其證身重如山不能轉側宜服除風勝濕去熱之劑如不可則用鍼灸治之今具六經續命湯治法

方見下中

中風

夫風天地山川四時五行八方之正氣從其鄉來者生長人物則人少病若諸邪風非是四時乘節之風非山川鼓振之風不從其鄉

來而從所勝來者爲賊邪病人害物此天時無風之日乃人間庭巷門戶窓牖之逕氣耳中則中五臟傷則傷六經輕則曰感曰冒重則曰中曰傷

論脉風邪中人六脉多沉伏亦有脉隨氣奔指下洪盛者挾寒脉帶浮遲挾暑則脉虛挾濕則浮濇若脾脉緩者難治盖風喜歸肝肝木克脾土則大便洞泄難治大便秘可治浮遲吉急實凶

論證治肥人風邪易中而不得外泄卽爲熱中而目黃瘦人得外泄卽爲寒中而泣淚出脉浮而數風中腑也風中脉則口眼喎斜風中腑則支體癱風中臟則危矣寒入臟則使人瘖啞緩縱噤口不言瘖強背風入陽經則狂入陰經則癩入皮膚則痒入筋則攣急入骨節則疼痛入諸陽脉俞散於分肉與衛氣相搏氣不行故肉不仁與榮氣相搏故半身不遂氣順血澁爲癱風則筋脉拘攣血順氣虛爲

癱風則躄軟不舉癱風則益血補筋去風藥治之癱風不可全用風藥兼用理氣藥治之凡中風言不變志不亂病在分腠之間溫卧小汗爲可復也凡口目俱閉易治髮直搖頭吐沫上擲面赤或頭面青黑汗綴如珠痰聲如拽鉅眼閉肝氣絕手散脾氣絕口開心氣絕遺尿不知腎氣絕鼻鼾肺氣絕五者爲五臟絕五臟俱絕爲不治若見其一尤當施治也心腎絕尤難治氣中方書不載此七情內因其證與中風相似但

風中多痰涎氣口中無涎自當順氣治風之法當以暖散通氣為先氣通則痰氣不熏蒸風亦自得以攄散矣風為散氣見於陽經故多汗其輕者在皮膚瘡癬語蹇眉引耳鳴目旋

脉

病證

治

人迎

面目青惡風自汗左脇五臟中風脉

肝并左

痛筋寒則攣急筋熱皆浮但兼以

關浮

則弛張若上喘直視本脉而見於

弦

唇口手足爪甲青黑本部與人迎

不治

相應也假令

人迎

面舌赤發熱瘖不能言肝中風則左

并左

咽中噫噫有聲自汗手關部與人

心寸浮

身強痛狂言者生若迎脉並浮而

洪

唇面黃赤青黑不定弦也餘皆倣

眼瞶不治

此

脾

人迎并右關浮

四支不收皮肉瞶動一風喜歸肝其

身通黃口吐鹹沫尚中腑為輕中

微而遲

可治若手足俱青木賊士敗不治

臟則危厥陰肝風木之經

人迎

面浮氣喘咽中噫噫有

其得訂多出

并右

聲鼻不知香臭自鼻

肝而生故於

肺寸浮

下至口色白者可治

治法列之肝

濇而

若失血妄言色黃者

臟之下有不

短

不治

能盡今以脉

人迎

面耳黑腰脊痛引小腹

證治開列于

腎并左尺浮

脇肋邊未有黃點者

後其風入各

滑

可治若齒黃面吐土臟者各以脉色不治證合之

六府無中風惟胃有者

胃為水谷海變化五

味以資五臟虛則風

邪中之其證額上多

汗隔塞不食食寒則

腹脹而泄

五臟風輪皆有汗六府

胃并人迎大關并浮

醫方類聚  
卷之十四  
中暑

無汗惟胃有之亦止  
頭額上有汗

肝

病證

治

諸暴卒中僵仆不先用蘇合香圓

省人事  
擦牙上灌以

陰中即為寒中其  
生姜自然汁

人顏青臉白痰  
或用稀涎散

厥喘塞昏亂眩  
微出其涎方

暈喘斜不遂或  
可用藥百

沉伏

帶急皆

外

因

手足厥冷不知  
一選入味青

人多汗  
州白元子

中暑有卒暴昏悶  
簡易附香飲

之證其脉虛弱  
生姜附湯

而微遲見諸暑  
星香湯 順

門  
元散 濟生

星附湯 三

生飲 氣虛

眩暈人難服

類聚十四  
三

浮盛  
而急

<p>陽中即為熱中臉 赤如醉怒牙關 緊急上視直強 掉眩素問云諸</p>	<p>虛寒甚三建湯 虛極二香三 建湯如藥不 下多灸關元 丹田二穴</p>
<p>集通頂散中 選用 痰氣 閉藥不下灌 以楊氏奪命 散 氣盛人 服熱藥不得 者止且簡易 星香散 續 易簡加減續</p>	<p>先用蘇合香圓 生姜自然汁 擦灌或用稀 涎散 簡易</p>

風掉眩支痛強  
直筋縮為厥陰  
風木之氣自大  
寒至小滿風木  
君火二氣之位  
風主動善行數  
變木旺生火風  
火屬陽多為兼  
化且陽明燥金

集通頂散中  
選用 痰氣  
閉藥不下灌  
以楊氏奪命  
散 氣盛人  
服熱藥不得  
者止且簡易  
星香散 續  
易簡加減續

頁  
四

三

主於緊斂縮勁

命湯 簡易

風木為病反見

集千金加減

燥金之化由亢

小續命湯

則害承乃制謂

烏藥順氣散

已過極則反似

濟生八味順

勝已之化正所

氣散 省風

謂木極似金况

散 三因防

風能勝濕而為

風湯 獨活

燥風病勢甚而

湯 續易簡

成筋縮燥之甚也

紫豆湯 簡

易大省風湯

加減三奇湯

選奇去風丹治

中風及脚氣

七月半採紫

色浮萍為蜜

元又見本草

啗斜用生姜汁

浮緩

喎斜不遂

邪入陽

經氣血

偏虛不

行

調蘇合圓貼

之并可服

簡易天仙膏

南星膏并灸

法續簡易

草麻膏楊

氏牽正散

局方小續命

湯寒中三

野

水不

生飲濟生

省風湯五月

五六月六採

稀簽作圓

簡易四生圓

三奇湯挾

寒三因附子

湯挾暑防

風湯挾氣

戰

雨

淋瀝

參

夏

醫

醫

醫

浮滑

而散

浮緩

簡易回陽湯

邪入肝簡易集左經圓

經氣血四生圓虎

偏枯癱瘓

偏虛春骨散三奇

夏甚秋湯羌活散

冬愈烏龍丹萬

靈丹本事

星附散

麻木不仁

風寒濕三氣所

楊氏太白散

成通見諸痺門

局方五痺湯

十脂不仁是

齋附香湯

局方排風湯

三五七散

三因附子湯

三因竹瀝湯

獨活散簡

易解語湯

弦遲

口噤不語

心脾受邪見於

類聚十四

口舌

三五

浮緊

牙關緊急  
邪中肝  
經筋急

加減小續命

湯 獨活湯

三奇湯 加

暈倒吐痰手

足厥或煩燥

姜附湯

姜汁蘇合香圓

稀涎散 簡

易通頂散

急細

如弦

四肢拘攣  
邪中肝  
經

雄附省風湯

加心風驚恐

局方驚氣圓

熱涎咽腫解

毒雄黃圓

簡易虎骨散

三聖散 活

血丹 加減

黃金散 集

資奇黑龍圓  
 左經元局  
 方虎骨散  
 本事木瓜煎  
 烏頭湯連  
 臂痛葉氏十  
 味剉散濟  
 生虎骨酒  
 選奇地仙圓

浮緊

身體疼痛

風寒濕  
氣搏於  
陽明經

葉氏十味剉散

蠲痺湯簡

易局方七聖

散大防風

湯

沉弦

腰膝軟痛

邪入少  
陰腎經  
通見脚  
氣門

局方大防風湯

五痺湯七

聖湯青娥

圓簡易蠲

浮火

而長

狂言恍惚

風邪入心通見心腹痛癰瘤門

痺湯 澹寮 趁痛圓

局方排風湯

邪入心定志

圓 驚氣圓

壽星圓 牛

黃清心圓

本事真珠圓

楊氏黃石圓

浮緊

心腹拘急切痛

風冷客三焦

聖惠金薄圓

簡易三聖湯

聖惠桂心散

赤芍藥散

附子散

沉伏

痰潮吐眩小便不通 三因白散子

肝腎中風

浮弦

走疰疼痛

皮膚骨節受風毒往來疼痛無

烏藥順氣散

虎骨散 澹

常

寮趁痛圓

下疔腰膝生

瘡局方四生

散

寸微澁

關上緊

頑麻血風陰邪入肝心經

局方烏荆元

追風散消

風散入風

散楊氏京

芥元澹寮

浮數

熱毒風

皂角六一圓

御院防風通聖

散經驗川

芎石膏湯

楊氏獨活散

肝腎風毒局

方四生散

浮弦

熱痰腫閉通見咽喉門

局方解毒元

御院上清散

防風通聖散

局方清心散

消風散 茶

調散 上清

散 御院太

辰砂元 乳

香消風散

生朱砂元

簡易羚羊角

浮數

風熱頭疼鼻塞

通見頭  
痛門

散 定風餅

子白芷散

楊氏甘菊元

防風散 獨

活散

四生散 消風

散 八風散

追風散 御

院大辰砂圓

瘙痒風

白虎風 癱門

纏喉風 癱門

浮為

風應

人迎

洪為

氣應

氣口

內

因

氣中

與口中風相似  
但口中無涎  
必審脈之沉  
伏洪盛證與  
病者之虛實

不可多用下痰

藥惟當理氣

壅閉與蘇合

香圓擦牙灌

以生姜自然

汁輕則濟生

八味順氣散

局方四七湯

七氣湯 兼

風濕選奇二

和散 生五

積二錢順元

散一錢姜五

片煎服 簡

易姜活散

續易簡回陽

湯 獨香散

澹寮九寶飲

烏附圓 本

事拒風丹

脉沉簡易附

香飲

筋擊魂傷肝肉脫神傷心肢廢意傷

脾皮槁魄傷肺腰脊不可俛仰志傷

腎五者以明內因隨所傷各臟內施

補治

蓐風婦人產後

舉卿古拜散

清魂散、雞

瓜風 經驗

五加皮散

簡易七味附子

湯 三因附

子湯

簡易定風餅子

集聖惠枳殼

不

內

外

內風房室虛乏惡風自汗身疼骨痠

漏風飲酒中風

首風新沐所致

酒  
三因附子摩頂散

白虎瘧節

體虛之人受風寒濕毒之氣使血氣筋脉凝滯傳於骨節四肢間肉色不變骨如虎噬之痛晝靜夜劇巢氏云飲酒當風汗出入水所致久則骨節蹉跌成癩癘

風病證治

浮弦

風掣疼黃汗出面微紅

交加散虛則濟生寄生湯虎骨散羌活散蠲痛元澹寮越痛元簡易麝香元千金桃仁膏發汗麻黃散

緊或遲寒掣疼肢節小瀋筋急痺

五積加順元散入麝香三因烏頭湯附子八物湯濟

生羌活散寄生湯  
加肉桂芍藥

人參敗毒散 復元

通氣散 五苓散

加赤芍藥當歸量

虛實

虛

暑掣疼面赤煩  
悶或小便少

微細而濕掣疼腫滿無五積加麝香 朮附

濡 汗身疼腰重

湯 滲濕湯 五  
苓散加芍藥

防已黃芪湯加附  
子 簡易集茵芋  
元

病退後証在裏大便秘交加散加大黃量與

四順飲寒濕併交加散加麝香

表裏未解交加散加烏藥順氣散秘結麻仁

元

四肢疼痛不可忍生五積加川羌活川獨活  
穿山甲製過隨痛處所向取甲燒炒存性入

煎臨熟入麝香

醫方集成

風

風爲百病之長故諸方首論之岐伯所謂大法有四一曰偏枯半身不遂二曰風痲於身無痛四肢不收三曰風懿者奄忽不知人也四曰風痺者諸痺類風狀此特言其大槩而又有卒然而中者皆由氣體虛弱榮衛失調或喜怒憂思驚恐勞役以致真氣耗散腠理

不密邪氣乘虛而入及其中也重則半身不遂口眼喎斜肌肉疼痛痰涎壅盛或癱瘓不仁舌強不語精神恍惚驚惕恐怖治療之法當詳其脉證推其所感之原若中於肝者人迎與左關上脉浮而弦面目多有惡風自汗左脇偏痛中於心者人迎與右寸脉洪而浮面舌俱赤翕翕發熱瘖不能言中於脾者人迎與右關上脉浮微而遲四肢怠憊皮肉瞤動身體通黃中於肺者人迎與右寸口脉

浮濇而短面浮色白口燥多喘中於腎者人迎與右尺脉浮而滑面耳黑色腰脊痛引小腹隱曲不利中於胃者兩關脉並浮而大額上多汗膈塞不通食寒則泄凡此風證或挾寒則脉帶浮遲挾濕則脉帶浮濇二證俱有則從偏勝者治之用藥更宜詳審若因七情六淫而得者當先調氣而後治風邪此嚴氏至當之論倉卒之際救此急證宜先以皂角細辛搐入鼻內通其關竅次以蘇合香圓擦

牙連進以生薑自然汁并三生飲俟其甦醒然後次第進以順氣之類排風續命之類所中在經絡脉微細者生入于臟腑和開手散眼合遺尿髮直吐沫搦頭直視聲如鼾睡者難治又有中之輕者在皮膚之間言語微蹇眉角牽引遍身瘡癩狀如虫行目旋耳鳴又當隨證治之

經驗良方

論中風病及諸風證

黃帝素問載諸風掉眩強直支痛癱戾裏急  
筋縮爲足厥陰風木肝膽之氣也風主動風  
氣甚則頭目眩暈手足掉搖由肺金衰不能  
制木而木能生火故風火多爲兼化風又爲  
陽邪皆陽熱之氣偏多也風之爲病或爲寒  
熱或爲熱中或爲寒中爲厲風爲偏枯或腰  
脊強痛或耳鳴鼻塞發爲諸證其狀不一者  
善行數變也風邪中人自入臟腑俞穴而入  
入臟則危入腑則猶可治其輕者傷於腠理

則洒然閉則熱而悶風氣俱入行於諸脉分  
肉之間與衛氣相干其道不利怫鬱不得傳  
徧升降故肌肉憤臄不知寒熱痛痒頑痺加  
木石而不仁也且風生於熱以熱爲本而風  
爲標風氣壅滯與熱相挺銷爍氣液結爲稠  
涎使人昏悶卒暴僵仆不知人事  
醫林方

中風雜說

中風人能食凡中風病多能食也蓋甲巳化

土脾盛故能食由是多食則脾氣愈盛脾能  
制腎腎水既虧則病增劇也病宜廣服藥餌  
不欲多食病能自愈有云胃熱則善能消穀  
熱邪不除風何而愈中風病多食者風木也  
盛則克脾脾受敵則求助於食經曰實則夢  
與虛則夢取是也當瀉肝木治風安脾脾安  
則食少是其効也

施圓端効方

諸風

經云風者天地之氣也德敷陳發代應長生  
政順歲時令行生殺氣交萬物以生成玄道  
善行而數變風之傷人也或爲癘風或爲寒  
熱酒汗漏風房汗內風新沐中風則爲首風  
久風入中則爲腸風春傷夏泄冬數秋生腑  
藏諸風形狀不同治之方法各以其能風衆  
病先故爲方首  
事林廣記 用藥效驗  
半身不遂

中風半身不遂口眼喎斜與七寶丹偏風語  
言蹇澁與小續命湯偏風走疰疼痛身體麻  
痺與活絡丹偏風恍惚不定與排風湯偏風  
痰盛與青州白丸子拘急脚弱口噤與龍虎  
丹癱瘓不遂與透冰丹筋脉攣痛與驅風丸  
乳香趁痛散

諸風寒溫

風溫者由人腠理虛風與寒溫氣傷之每遇  
夜間或三四更以來腰背倦痛轉側不得或

身體倦痛者爲有寒溫可與小續命湯大便  
秘小便多身疼痛者與朮附湯若骨節煩疼  
者與乳香趁痛散或身體麻木足脛弱者與  
追風應痛丸黃耆丸腰痛甚者與青蛾丸

諸風

風氣手足不遂用五積散姜棗煎去滓熱磨  
香服之或先與蘇合香丸尤炒暴中風未可

磨煎五積散灌

蘇合香丸

無藥備用急取頂心髮一撮毒撒之以省人事為度

中風

凡人初中風切不可先吃風藥及附子先吃氣藥

后吃附子不妨

玉機微義

中風門

中風敘論之始

內經曰風之傷人也或為寒熱或為寒中或

為熱中或為偏枯風善行而數變至其變化

乃為他病歷陳五臟與胃之傷及風病名皆

多汗而惡風詳見本文

按風論發明風邪係外感之病有內外臟

腑虛實寒熱之不同別無癱瘓痿弱卒中

不省僵仆喎斜攣縮眩暈語澀不語之文

後世始與痿證混殺矣

要略云風之為病當半身不遂經絡空虛賊

邪不瀉或左或右邪氣反緩正氣即急正氣

引邪喎僻不遂邪在於絡肌膚不仁在經卽  
重不勝邪入腑則不識人入臟卽難言口吐  
涎  
千金云岐伯中風大法有四一曰偏枯半身  
不遂二曰風痲於身無痛四肢不收三曰風  
懿奄忽不知人四曰風痺諸痺類風狀

按後世編集中風方治皆祖要略巢氏千  
金之論但不當以外中風邪立名而與內  
臟痿證袞同出治此千古之弊也

### 中風脉法

要略云脉微而數中風使然又云頭痛脉滑  
者中風風脉虛弱也又寸口脉浮而緊寸口  
脉緩而遲皆曰中風也

脉經云浮而大者風又浮而緩皮膚不仁風  
寒入肌肉又滑而浮散者癱瘓風又診人被  
風不仁痿躄其脉虛者生堅急疾者死

### 中風不治證

髮直吐沫搖頭上竄直視口開手撒眼合遺

尿不知人或面赤如粧或頭面青黑汗綴如珠聲如鼾睡皆不可治

風分在臟在腑在經之異

病機機要云風本爲熱熱勝則風動宜以靜勝其燥是養血也治須少汗亦宜少下多汗則虛其衛多下則損其榮宜治在經雖有汗下之戒而有中藏中府之分中府者多著四肢有表證而脈浮惡風寒拘急不仁中藏者多滯九竅唇緩失音耳聾鼻塞目瞶大便結

秘中府者宜汗之中藏者宜下之表裏已和宜治之在經當以大藥養之

發明云中血脉則口眼喎斜中府則支節廢中藏則性命危三治各不同中血脉外有六經之形證則從小續命加減中府內有便溺之阻隔宜三化湯等通利之外無六經之形證內無便溺之阻隔宜養血通氣大秦芎湯羌活愈風湯主之

按此分在表在裏在經之三證立汗下調

養之三法可謂開後世之盲聾但所用諸方學者宜詳審之

治風不可下論

發明云治風當通因通用惟宜宣發以散之不可便以苦寒之藥妄下龍麝朱砂牛黃諸鎮墜之藥瀉之

按此言風本外邪惟宜宣散此風在表之時也如傷寒中風傳入於胃亦未嘗不可下論中便字妄字可見其意便者有早與

急之義妄者謂有不當下之義

治風不可利小便

如小便少不可以藥利之既以自汗則津液外亡小便自少若利之使榮衛枯竭無以制火煩熱愈甚當俟熱退汗止小便自行也兼此證乃陽明經大忌利小便

濕病似中風論

元戎云酒濕之爲病亦能作痺證口眼喎斜半身不遂渾似中風舌強不正當瀉濕毒不

可作風病治之而汗也衍義論甚當易簡所言與此相同

按此則知口眼喎斜半身不遂之病豈止風之一端而已况六氣皆能中人其證亦有縱急搖擗不知人等證不可不以脉證分別

### 中風先調氣說

嚴用和云人之元氣強壯榮衛和平腠理緻密外邪焉能爲害或因七情飲食勞役致真

氣先虛榮衛空踈邪氣乘虛而入故致此疾若內因七情而得者法當調氣不當治風外因六淫而得者亦當先調氣後依所感六氣治之此良法也宜八味順氣散

按此說真氣先虛榮衛空踈邪氣乘虛而入擴前人所未發但既曰虛矣邪又入矣補虛散邪理所當然而止曰調者意其謂因病而氣壅不通調其通暢條達則真氣自復邪氣自行之義惜乎不能詳也况中

風治法豈止一端而已

中氣論

許學士云世言氣中者雖不見於方書然暴怒傷陰暴喜傷陽憂愁不已氣多厥逆往往得此疾便覺涎潮昏塞牙關緊急若便作中風用藥多致殺人惟宜蘇合香丸灌之便醒然後隨寒熱虛實而調之無不愈者經曰無故而瘖脉不至不治自已謂氣暴逆也氣復則已審如是雖不服藥自可

按氣中之說卽七情內火之動氣厥逆由其本虛故也用蘇合香丸通行經絡其決烈之性如摧枯拉朽恐氣血虛用非所宜也後云不治自復之意蓋警用藥之失實勝誤于庸醫之手也

四肢不舉有虛有實

病機云四肢不舉俗言癱瘓經謂土太過則令人四肢不舉此真膏粱之疾非肝腎經虛其治瀉令氣弱陽虛土平而愈三化湯調胃

承氣湯選而用之若脾虛亦令人四肢不舉其治可補十全散加減四物去邪留正按四肢不舉世俗皆以爲中風病此云脾土太過不及皆能致之其可一槩用藥乎論風非外來乃本氣病

發明曰經云陽之氣以天地之疾風名之此中風者非外來風邪乃本氣病也凡人年逾四旬氣衰之際或因憂喜忿怒傷其氣者多有此疾壯歲之時無有也若肥盛則閒有之

亦是形盛氣衰而如此治法當和藏府通經絡便是治風然亦有賊風襲虛傷之者也治法輕重有三見前分在經在府在藏之異

按此云本氣自病乃與劉河間論內熱所生相合但彼云熱而此云虛虛之與熱並行而不相悖也

### 風本於熱論

河間曰風病多因熱甚俗云風者言末而忘其本也所以中風有癱瘓者非謂肝木之風

實甚而卒中之也亦非外中於風良由將息失宜而心火暴甚腎水虛衰不能制之則陰虛陽實而熱氣怫鬱心神昏冒筋骨不用而卒倒無知也多因喜怒悲憂恐五志過極而卒中者皆爲熱甚故也若微則但僵仆氣血流通筋脉不攣緩者發過如故或熱氣太甚鬱滯不通陰氣暴絕陽氣後竭而死 痰涎者由熱甚則水化制火而生 偏枯者由經絡一側得通否者痺而癱瘓也 口噤筋急

者由風熱太甚以勝水濕又津液滯于胸膈以爲痰涎則筋太燥然燥金主于收斂勁切故也或筋反緩者乃燥之甚血液衰少也諸筋攣易愈諸筋痿難復以見燥之微甚也

### 治風用汗吐下三法

子和云諸風掉眩皆屬肝木掉搖眩運目囁筋急手搐瘳瘳皆厥陰肝木之用也經云氣淫所勝平以辛涼世何以熱藥治風邪予治驚風癇病屢用汗吐下三法隨治愈木鬱達

之者吐之令其條達也汗者風隨汗出也下者推陳致新也失音悶亂口眼喎斜可用三聖散吐之如牙關緊急鼻內灌之吐出涎口自開也次用通聖散涼膈散大人參半夏丸甘露飲除熱養液之寒藥排而用之

按此法的係邪氣卒中痰涎壅盛實熱者可用否則不敢輕易也

論中風不當與痿證同治

丹谿曰今世所謂風病大率與諸痿證衮同

論治良由局方多以治風之藥通治痿也古聖論風痿各有條目源流不同治法亦異夫風病外感善行數變其病多實發表行滯有何不可局方治風之外又歷述神魂恍惚起便須人手足不隨神志昏憤癱瘓痺痺手足筋衰眩暈倒仆半身不遂脚膝軟弱四支無力顫掉拘攣不語語澁諸痿等證悉皆治之不思諸痿皆起於肺熱傳入五臟散爲諸證其昏惑瘖瘖瞽問瞽昧暴病鬱冒蒙昧暴瘖

瘳昧皆屬於火曰四支不舉舌本強足痿不  
 收痰涎有聲皆屬於土悉是濕熱之病當作  
 諸痿論治若以外感風邪治之寧免虛虛實  
 實之禍乎若夫岐伯仲景孫思邈之言風大  
 意似指外之感劉河間之言風明指內傷熱  
 證實與痿證所言諸痿生於熱相合外感之  
 邪有寒熱虛實而挾寒者多內熱之傷皆是  
 虛證無寒可散無熱當作實可瀉  
 謹按中風之病古方冠諸方首以其為人

之大病也夫風乃六淫中之一天之邪氣  
 自外而入者也古人用藥皆是發散表邪  
 通行經絡之劑以其自表而入亦當自表  
 而出也至於東垣令在經在府在藏而有  
 汗下調養之法可謂詳備精密則又通表  
 裏中三法而治矣若劉河間以為熱甚制  
 金不能平木或濕土過甚反兼木化皆非  
 外中於風乃因內熱而生迥出前古之論  
 我先師丹谿先生謂數千年得經意者河

間一人耳由是觀之若病從外邪而得元氣壯實者當從古方發散之例但用藥不宜小續命湯須分所挾有寒熱溫涼之異受邪有藏府經絡之殊若病因內熱而生者當從劉河間之論但有用藥不宜如子和專以吐汗下爲法蓋病邪有虛有實難一槩論又况痿病實與內熱所生相同醫者須宜識此或問外邪之感與內熱之傷何者爲多也丹谿曰西北氣寒爲風所中

誠有之矣東南氣溫而地多濕有風病者非風也皆濕生痰痰生熱熱生風也經曰亢則害承迺制是也治痿之法詳見痿條此不贅及

內因似中風論

盧砥鏡曰經云神傷於思慮則肉脫意傷於憂愁則肢廢魂傷於悲哀則筋攣魄傷於喜藥則皮搞志傷於盛怒則腰脊難以俛仰也何侍郎有女適夫夫早世女患十指拳攣掌

垂莫舉膚體瘡瘍粟粟然湯劑雜進飲食頓  
減幾於半載適與診之則非風也正乃憂愁  
悲哀所致爾病屬內因於是料內因藥仍以  
鹿角膠輩多用麝香熬膏貼痿垂處漸得掌  
能舉指能伸病漸近安

謹按經云風之傷人也爲病善行而數變  
變至他證之類故爲治不得其病情者往  
往或以風爲他證或以他證爲風皆不免  
乎得失之誚惟近代河間東垣丹谿諸先

生者出始論他證之非中風治法當異此  
又慮氏治例可謂深達病情之機者卽河  
間所論五志過極爲病之例非真中風也  
而王安道又曰人有卒暴僵仆或偏枯或  
四肢不舉或不知人或死或不死者世以  
中風呼之而方書亦以中風治之因嘗攷  
諸內經論風爲諸證其卒暴僵仆不知人  
四肢不舉者並無所論止有偏枯一語而  
已及觀千金方則皆引岐伯之旨金匱要

略具脉證邪在絡在經入府入藏之異由是觀之則卒暴僵仆不知人偏枯四肢不舉等證固爲因風而致者矣乃用大小續命兩州續命排風入風等諸湯散治之及近代河間東垣丹溪三子者出所論始與昔人有異河間主于火東垣主于氣丹溪主于濕反以風爲虛象而大異於昔人矣吁昔人之與三子者果孰是歟果孰非歟若以三子爲是則三子未出之前固有從

昔人而治愈者矣以昔人爲是則三子已出之後亦有從三子而治愈者矣故不善讀其書者往往不得其奧以余觀之昔人與三子之論皆不可偏廢但三子以類乎中風之病視爲中風而立論故使後人狐疑而不能決殊不知因于風者真中風也因火因氣因于濕者類中風而非中風也三子所論者自是因火因氣因濕而爲暴病暴死之證與風何相干哉如內經所謂

三陰三陽發病爲偏枯痿易四肢不舉亦未嘗必因於風而後能也夫風火氣濕之殊望聞問切之間豈無所辨乎辨之爲風則從昔人以治辨之爲火氣濕則從三子以治如此庶乎析理明而用法當矣惟其以因火因氣因濕之證強引風而合論之所以真僞不分名實相紊若以因火因氣因濕證分而出之則真中風病彰矣所謂西北有中風東南無中風者其然歟否歟

斯辨諸子所論名實相紊而不明真中風之異可謂精切又何疑丹溪東南無中風之語哉夫風者天地之大氣也五運之造化四時之正令耳上下八方無所不至者且人在氣中形虛者卽感之傷之中之有輕重不同實八風虛實之異耳矧有痿濕火熱痰氣虛諸證而似中風故古今治例不一是以徐先生折衷諸經之旨辨已上諸證不得與中風同治又豈惟三子所論

哉然王氏以擴充其列因有是辨亦不害其爲叮嚀也。余嘗居涼州卽漢之武威郡也其地高阜四時多風少雨土藝粟麥引泉灌溉天氣常寒人之氣實腴密每見中風或暴死者有之蓋折風燥烈之甚也。時洪武乙亥秋八月大風起自西北時甘州城外路死者數人余亦始悟經謂西北之折風傷人至病暴死之旨不誣丹溪之言有所本也人蓋不經其所雖審經意故莫

不有疑者也吁醫之不明運氣造化地理病機之微而欲行通變之法者難矣哉

敘癘風爲病

內經曰風氣與太陽行諸脉俞散於分肉之間與衛氣相干其道不利故使肌肉膜腠而有瘍衛氣有所凝而不行故其肉有不仁也癘者有榮衛熱附其氣不清故使鼻柱壞而色敗皮膚瘍潰風寒客於脉而不去名曰癘風

癘風治法

內經云病大風骨節重鬚眉墮名曰大風刺  
肌肉爲故汗出百日王注泄衛氣之怫熱刺  
骨髓汗出百日泄榮氣之怫熱凡二百日鬚  
眉生而止針怫熱屏退陰氣內復故多汗出  
鬚眉生也

靈柁云癘風者數刺其腫上已刺以銳針針  
其處按出其惡氣腫盡乃止常食方食勿食  
他食以犯其病

論癘風屬肺生虫屬木皆血熱之病

病機云內經云脉風成爲癘俗云癩病也先  
樺皮散從少至多服五七日灸承漿穴七壯  
灸瘡輕再灸瘡愈三灸之後服二聖散泄熱  
祛血中之風邪戒房室三年病愈藥灸同止  
述類象形此治肺風之法也然此疾非止肺  
藏有之以其病發於鼻俗呼爲肺風也鼻腫  
準赤脹大而爲瘡乃血隨氣化也氣既不施  
則血爲之聚血既聚則使肉爛而生虫也生

虫者厥陰主之厥陰爲風木主生五虫蓋三焦相火熱甚而制金金衰故木來剋侮宜瀉火熱利氣之劑虫自不生也故此疾血熱明矣當以藥緩踈泄之前局方升麻湯下錢氏瀉青丸餘病各隨經治

按癘風皮毛血脉先受病二者屬榮衛所主故言肺風至於內壞生虫又陽明厥陰所屬故其用藥皆踈泄肺氣祛逐血分之邪熱其灸承漿一穴乃陽明任脉之會所

以宣通血脉以散風也

論癩風宜汗宜下宜出血

子和書云內經論癩針二百日眉毛再生針同發汗也但無藥者用針一汗可抵千針故高供奉嘗採萍治癩瘰風出汗張主簿病癩十餘年戴人曰足有汗者可治之當發汗其汗出當臭其涎當腥乃置煖室中以三聖散吐之汗出周身如卧水中其汗果臭痰皆腥如魚涎足心微有汗次以舟車丸瀦川散下

五七行如此數次乃瘳又一人病風面黑爬搔不已眉毛脫落刺其面大出血如墨刺三次血變色每刺自額至頤排針上下俱刺每隔日一刺至二十餘日方已  
按此論內經用針同發汗至於出血亦同汗也但癘證在經在表故宜針宜汗有惡血留滯故宜出血或於腫上或於委中皆可也又腸胃有穢惡出積故宜下大抵皆宜泄表裏血氣邪熱之毒也

論癘風所因

三因之經所載癘風卽風論所謂惡疾是也雖名曰風未必皆因風大率多嗜慾勞動氣血熱發汗泄不避邪風冷濕使淫氣與衛氣相干致肌肉皮膚瘍潰鼻梁塌壞千金所謂自作不仁極猥之業雖有悔言而無悔心良得其情然亦有傳原染者其所因皆不內外涉外所因而成也治之須推其所因凡因風寒濕熱兼勞役飲食與夫傳染類然不同若

例以瀉風藥治之則失矣

按此云雖名曰風未必皆因風此論固善  
蓋此疾多由嗜慾飲食積毒之所致因其  
病證穢惡可畏又不可不謂之風也若夫  
傳染之說世或有之雖因其一家血脉飲  
食居處氣味之相傳者本無內熱積毒亦  
不能染也

論大風有上下之分

丹溪云大風病是受得天地間殺物之風古

人謂之癘風以其酷烈暴悍可畏爾人得之  
者須分在上在下夫在上者以醉仙散取臭  
涎惡血於齒縫中出在下者以通天再造散  
取惡物陳虫於穀道中出所出雖有上下道  
路之異然皆不外乎陽明一經治此病者須  
知此意看其疔瘡與瘡上先見者上體多者  
在上也下先見者下體多者在下也上下同  
得者在上後在下也陽明經胃與大腸也無  
物不受此風之入人也氣受之則在上多血

受之則在下多血氣俱受者甚重自非醫者  
有神病者有鐵心罕有免者夫或從上或從  
下以漸而來者皆可治病人見其病勢之緩  
多忽之雖按此法施治病已全然脫體若不  
能絕味絕色皆不發再發則終於不收免某  
曾治五人矣中間唯一婦人得免以其貧甚  
無物可吃也餘四人三兩年後皆再發孫真  
人曰吾嘗治四五百人終無一人免於死非  
孫真人之不能治也蓋無一人能守禁忌耳

此一婦治本病外又是千餘貼加減四物湯  
半年之上方得月經行而十分安全金匱鈎  
法在上者醉仙散在下者通天再造散後用  
通神散可用三稜針委中出血不能忌口絕  
房勞者不治

謹按癘風古方謂之大風惡疾以其瘡癘  
荼毒膿汁淋漓眉鬢墮落手足指脫頑痺  
痛痒鼻塌眼爛齒豁唇揭病勢之可畏耳  
若專以房勞嗜慾飲食積毒之所致何爲  
遽至於是故丹溪先生亦謂之受得殺毒

之風也蓋其風毒之傷與夫內毒所致人皆安得而知之及其病證顯露方始歸咎於此其於外受之風內積之毒豈可得而分治之也故內經刺肌肉刺骨髓以泄榮衛之怫熱靈樞以銳針刺腫上按出惡氣惡血子和用汗下吐出血之法河間用疎風泄熱之劑俱不分病之所因隨其病之所在以調之也至於丹溪分在上在下氣血受病多少其用藥取涎下毒雖皆前人

之法亦可謂深得病情而善用其法者矣學者宜細觀之若夫用藥之外守禁忌謹調養清心絕欲獨淡內觀又在夫人而不在于醫也孫真人戒之深矣其可忽乎

論破傷風表裏中治法

病機云破傷風者同傷寒證治通於表裏分別陰陽有在表有在裏有在半表半裏者在裏宜下在表宜汗在表裏之間宜和解不可過其治也故表脉浮而無力者太陽也脉長

而有力者陽明也。脈浮而弦小者少陽也。若明此三法而施治不中病者鮮矣。

原病式云：夫破傷中風之由者，因瘡熱甚，鬱結而榮衛不得宣通，怫熱因之，徧體故多白痂。是時瘡口閉塞，氣難通泄，熱甚則生風也。不已則表傳于裏，亦猶觸冒傷寒，怫熱鬱甚不解，則表傳于裏者也。但有風熱微甚兼化，故殊異矣。大法破傷中風，風熱燥甚，怫鬱在表而裏氣尚平者，善伸數欠，筋脈拘急，或時

惡寒或筋惕而搐，脈浮數而弦也。宜以辛熱治風之藥，開衝結滯而愈。猶傷寒表熱怫鬱，而以麻黃湯辛熱發散者也。凡用辛熱開衝風熱結滯，宜以寒藥佐之，則良。免致藥中病而風熱轉甚也。如治傷寒發熱，用麻黃桂枝加黃芩石膏知母之類是也。若世以甘草滑石葱豉寒藥發散甚妙。若表不已，漸傷入裏，裏又未太甚而脈在肌肉者，宜以退風熱開結滯之寒藥調之。或微加治風辛熱，亦得。猶

傷寒在半表半裏而以小芫胡和解之也若裏熱以甚而舌強口禁項背反張驚搖惕搦涎唾稠粘胃腹滿塞而或便溺閉結或時汗出脉洪數而弦也然汗出者由風熱鬱甚于裏而表熱稍罷則腠理踈泄而心火熱甚故汗出也法宜除風散結寒藥下之後以退風熱開結滯之寒藥調之而熱退結散則風自愈矣凡治此亦宜按摩導引及以藥幹開牙關勿令口禁使粥藥得下也

按此論表裏中脉病證治至爲詳盡前人所未論也

論破傷風所因不同

病機云破傷風者有因卒暴傷損風襲之間傳播經絡至使寒熱更作身體反張口噤不開甚者邪氣入藏有因諸瘡不瘥榮衛虛肌肉不生瘡眼不合風邪亦能外入於瘡爲破傷風之候有諸瘡不瘥舉世皆言著灸爲止是謂熱瘡而不知火熱客毒逐經諸變不可

勝數微則發熱甚則生風而搐或角弓反張  
口噤目斜亦有破傷不灸而病此者因瘡著  
白痂瘡口閉塞氣難通泄故陽熱易爲鬱結  
熱甚則生風也

按此論所因有四二者因瘡口入風似屬  
外因一者因灸逐熱似屬不內外因一者  
因瘡口閉塞內熱生風似屬內因也  
謹按破傷風證右方藥論甚少豈非以此  
疾與中風同論故不另立條目也唯河間

論與傷寒表裏中三法同治用藥甚詳其  
言病因有因外傷於風有因灸及內熱所  
作者然與中風相似也但中風之人尙可  
淹延歲月而破傷風者犯之多致不救蓋  
中風有在經在府在藏之異獨入藏者最  
難治破傷風或始而出血過多或瘡早閉  
合瘀血停滯俱是血受病血屬陰五藏之  
所主故此風所傷始雖在表隨即必傳入  
藏故多死也又此病或瘡口坦露不避風

寒而無所傷或瘡口閉合密避風邪而反病此或病已十分安全而忽有此大抵皆由內氣虛而有鬱熱者得之若內氣壯實而無鬱熱者雖傷而無所害也

### 金匱方

中風歷節病脉證并治

夫風之為病當半身不遂或但臂不遂者此為痺脉微而數中風俱然寸口脉浮而緊緊則為寒浮則為虛寒虛相搏邪在皮膚浮

者血虛絡脉空虛賊邪不瀉或左或右邪氣反緩正氣即急正氣引邪喎僻不遂邪在於絡肌膚不仁邪在於經即重不勝邪入於府即不識人邪入於藏舌即難言口吐涎

者外臺治風癱侯氏黑散治大風四肢煩重心中惡寒不足

菊花	四分	白朮	十分	細辛	三分	茯苓	三分	牡蠣	三分
桔梗	八分	防風	十分	人參	三分	石膏	三分	黃芩	五分
歸	三分	乾姜	三分	芎藭	三分	桂枝	三分		

右十四味杵為散酒服方寸七日一服初服二十日溫酒調服禁一切魚肉大蒜常宜冷食六十日止即藥積在腹中不下也熱食即下矣冷食自能助藥力

寸口脉遲而緩遲則為寒緩則為虛榮緩則為亡血衛緩則為中風邪氣中經則身痒而癢疹心氣不足邪氣入中則胸滿而短氣風引湯除熱癰癩

大黃 乾姜 龍骨各四兩 桂枝三兩 甘草

牡蠣各二兩 寒水石 滑石 赤石脂 白

石脂 紫石英 石膏各六兩

右十二味杵籠篩以韋囊盛之取三指撮井花水三升煮三沸溫服一升治大人風引少小驚癇瘈瘲日數十發醫所不療除熱方巢 脚氣宜風引湯

防已地黃湯治病如狂狀妄行獨語不休無寒熱其脉浮

防已一分 桂枝三分 防風三分 甘草二分

右四味以酒壹杯漬之壹宿絞取汁生地黃二斤咬咀蒸之如斗米飯久以銅器盛其汁更絞地黃汁和分再服

頭風摩散方千金方名 ○三因方附子摩頭

治因沐頭中風多汗惡風當先風一日而病甚頭痛不可以出至日則少愈名曰首風

大附子一枚炮 ○千金方煙霞聖效等

○千金方聖效方如附子大

右二味為散沐了以方寸匕已摩痰上千金

方聖效方摩頂上日三聖效方又云忌猪肉冷水 令藥力行

寸口脉沉而弱沉即主骨弱即主筋沉即為

腎弱即為肝汗出入水中如水傷心歷節黃

汗出故曰歷節

跌陽脉浮而滑滑則穀氣實浮則汗自出

少陰脉浮而弱弱則血不足浮則為風風血

相搏即疼痛如掣盛人脉濇小短氣自汗出

歷節疼不可屈伸此皆飲酒汗出當風所致

諸肢節疼痛身體魁癩脚腫如脫頭眩短氣

溫溫欲吐桂枝芍藥知母湯主之

桂枝芍藥知母湯方

桂枝四兩芍藥三兩甘草二兩麻黃二兩生薑五兩白

朮五兩知母四兩防風四兩附子二兩

右九味以水七升煮取二升溫服七合日

三服○三因方桂心知母防風各四兩芍藥

甘草炙麻黃節去附子炮去皮臍右為剉散

每服四錢水一盞半姜五片煎七分去滓

空腹服一法有白朮川芎杏仁半夏

味酸則傷筋筋傷則緩名曰泄鹹則傷骨骨

傷則痿名曰枯枯泄相搏名曰斷泄榮氣不

通衛不獨行榮衛俱微三焦無所御四屬斷

絕身體羸瘦獨足腫大黃汗出脛冷假令發

熱便為歷節也

病歷節不可屈伸疼痛烏頭湯主之

烏頭湯方治脚氣疼痛不可屈伸

麻黃二兩芍藥二兩黃耆各三兩甘草炙川烏五枚

取一升即出烏頭

右五味咬咀四味以水三升煮取一升去滓內蜜煎中更煎之服七合不知盡服之

礬石湯治脚氣衝心

礬石二兩

右一味以漿水一斗五升煎三五沸浸脚

良

古今錄驗續命湯

千金方簡易方名西州續命湯

治中風痲

千金方註云一作入藏

身體不能自收口不能言冒昧

不知痛處或拘急不得轉側千金方冒昧不知識人拘急背痛

不得轉側姚云與大續命同兼治婦人產後去血

者及老人小兒

麻黃

玉機微義三兩去節

桂枝

微義去皮

當歸

人參

石膏

微義綿裹

乾姜

甘草

各三兩

芎藭

翦

微義一兩

杏仁

四十枚去皮尖十四枚

右九味以水一斗煮取四升溫服一升當

小汗薄覆脊憑几坐汗出則愈不汗更服

無所禁勿當風并治但伏不得臥欬逆上

氣面目浮腫

○千金方麻黃

六兩

石膏

四兩桂

心二兩甘草宮翳乾薑黃芩當歸各一兩杏仁三十枚右九味咬咀以水一斗二升煮麻黃再沸掠去上沫後下諸藥煮取四升初服一升猶能自覺者勿熟眠臥可厚覆小小汗出已漸減衣勿復大覆可熟眠矣前服不汗者後復一升汗後稍稍五合一服安穩乃服勿頓服也汗出則愈勿復服飲食如常無禁忌勿見風并治上氣逆若面目大腫但得臥服之大善凡服此湯不下

者人口噓其背湯則下過矣病人先患冷汗者不可服此湯若虛羸人但當稍與五合為佳間有輒行此湯與產婦及羸人喜有死者皆為頓服三升傷多且湯濁不清故也但得清澄而稍稍服微取汗者皆無害也胡洽方古今錄簡易方治登與千麻黃六兩去根節石膏四兩桂心二兩甘草炙芎藭乾姜炮黃芩當歸各一兩杏仁三十枚每五錢水二盞姜三片煎一盞去滓溫服

千金三黃湯治中風手足拘急百節疼痛煩熱心亂惡寒經日不欲飲食

麻黃五分獨活四分細辛二分黃耆二分黃芩三分

右五味以水六升煮取二升分温三服一

服小汗二服大汗心熱加大黃二分腹滿

加枳實一枚氣逆加人參三分悸加牡蠣

三分渴加括蕞根三分先有寒加附子一

枚○千金方麻黃三十黃芩十八黃耆細

辛各十獨活兩一右五味咬咀以水五升者

取二升分二服一服小汗兩服大汗心中

熱加大黃半兩脹滿加枳實六銖氣逆加

人參十八銖心悸加牡蠣十八銖渴加括

蕞十八銖先有寒加八角附子一枚此方

秘不傳千金月令獨活四分麻黃三分黃耆去節

黃芩各二分細辛一分右以水五升煎取二升

分再服小汗便差有熱加大黃二分腹滿

加枳殼一枚去穰灸氣逆加人參三因方

治中風手足拘攣百節疼痛煩熱心亂惡

寒不欲飲食兼治賊風偏風猥腿風半身  
 不遂失瘖不言麻黃去節湯兩一分黃芪兩半黃芩  
三獨活兩一右為剉散每服四錢水盞半煎  
 七分去滓不以時服取汗為效心熱加大  
 黃半兩脹滿加枳實一分氣逆加人參三  
 分心悸加牡蠣三分渴加括蕪根寒加附  
 子一枚炮熟入得效方同

近效方术附子湯始風虛頭重眩苦極不知  
 食味暖肌補中益精氣

白术二兩附子一枚半甘草一兩  
炮去皮炙

右三味剉每五錢七姜五片棗一枚水盞  
 半前七分去滓溫服

崔氏八味丸治脚氣上入少腹不仁

乾地黄八兩山茱萸三兩薯蕷各四兩澤瀉二兩茯苓  
 芍藥各三兩桂枝二兩附子炮各二兩

右八味末之煉蜜和丸梧子大酒下十五  
 丸日再服

千金方越婢加术湯治肉極熱則身體津脫

腠理開汗大泄厲風氣下焦脚弱

麻黃六兩石膏半斤生姜三兩甘草二兩白朮四兩

棗十五枚

右六味以水六升先煮麻黃去上沫內諸

藥煮取三升分溫三服惡風加附子一

枚炮

千金方一

諸風

小續命湯治卒中風欲死身體緩急口目不

正舌強不能語奄奄忽忽神情悶亂諸風服之皆驗不令人虛方

麻黃 防己崔氏外臺不用人參 黃芩 桂心

甘草 芍藥 芎藭 杏仁各一兩 防風一兩

半附子一枚 生薑五兩

右十二味咬咀以水一斗二升先煮麻黃

三沸去沫內諸藥煮取三升分三服甚良

不瘥更合三四劑必佳取汗隨人風輕重

虛實也有人脚弱服此方至六七劑得瘥

有風疹家天陰節變輒合服之可以防瘡  
 一本云恍惚者加茯神遠志如骨節煩疼  
 本有熱者去附子倍芍藥小品千金翼同  
深師古今錄驗  
 有白朮不用杏仁救急無芎芎  
 藟杏仁止十味延年無防風○千金月令  
 主風入藏體緩筋急桂心甘草炙各三兩麻黃  
 去管人參芎附子炮白朮已芍藥黃芩  
 二兩已上各防風半一兩右以水一斗煮取二升  
 一兩已上各防風半一兩右以水一斗煮取二升  
 半分三服如人行三里進一服不差可服  
 三二料忌菘菜生葱生冷水和劑局方治

卒暴中風不省人事漸覺半身不隨口眼  
 喎斜手足顛掉語言蹇澀肢體麻痺神情  
 昏亂一本頭目眩重痰涎併多筋脉拘攣  
 不能屈伸骨節煩疼不得轉側若治脚氣  
 緩弱久服差久病風人遇天色陰晦節候  
 變更宜服以防瘡癘及治諸風服之皆驗  
 麻黃去節人參去蘆黃芩白芍藥芎藭甘草剉  
 杏仁去皮尖防已肉桂去皮各一兩防風去蘆一兩  
 半○三法附子炮去皮臍右除附子杏仁  
 六門一兩

外擣為麤散後入二味令勻每服三錢水

一盞半醫方集成南北經驗方袖珍薑五

片煎取一盞去滓食前三法六稍熱服王氏

集驗加棗一枚尤好三因方治證與干麻

黃去節防已崔氏外人參黃芩桂心甘草

炙白芍藥芎藭各一杏仁一兩湯去附子

一枚炮防風兩半右為剉散每服四大錢水

一盞半薑七片棗二个煎七分去滓不以

時服取汗隨人虛實與所中輕重有人脚

弱服此六七劑得差有風疹家天陰節變

輒合服之可以防瘡一云恍惚加茯神遠

志骨節疼有熱去附子芍藥古今錄驗有

白朮無杏仁救急無芎藭杏仁止十味延

年無防風一云遺失便利產後失血并老

人小兒用麻黃桂心甘草各二兩一法治

或歌哭或笑語無所不及用麻黃三兩入

參桂枝白朮各二兩無防風附子生姜有

當歸一兩簡易方治卒中風云云神情悶

亂與千金方同歷觀此湯治諸風不拘病之輕

重表裏深淺服之皆驗不令人虛藥材與局方同

但附子一枚右剉散每四錢水一盞半姜七片

棗二枚同煎七分去滓不拘時服取滓隨

人虛實與所中輕重也有人脚弱服此六

七劑得瘥有風疹家天陰節變輒合服之

可以防瘡小品于金翼同深師錄驗方有

白朮不用杏仁救急方無川芎杏仁延年

方無防風經驗良方此下云詳此方亦由張仲景古方又是桂枝麻黃各

半湯加防風輩若不用杏仁似失其立方本意又此方以防風為君去防風恐無義理

崔氏外臺方不用防已云忌猪肉冷水

海藻菘菜生葱一本云恍惚者加茯神遠

志骨節煩疼本有熱者去附子倍芍藥宋

氏藥證云煩燥大便秘本有熱者去附子

倍芍藥加竹瀝臟寒大便秘本有寒者去

黃芩加白朮附子骨肉冷痛者加肉桂附

子煩多驚者加犀角嘔逆腹脹加人參半

夏自汗者去麻黃究原方云中風語言蹇

瀝手足顫掉加石菖蒲竹瀝大便秘胃膈  
不快加枳實大黃氣塞不通加沉香有痰  
加天南星炮切數片葉氏方有羌活川烏  
炮去皮尖當歸去蘆無防已通前十三味  
春加麻黃一兩夏加黃芩三兩秋加當歸  
四兩冬加附子半兩風虛加川芎一兩失  
瘖加杏仁一兩燥渴加麥門冬乾葛各一  
兩身疼痛加秦艽一兩上氣浮腫喘急加  
防風一兩名四時加減續命湯直指方治

中風諸風迷仆涎潮舌強語蹇或昏潰痿  
弛或厥冷拘攣不論表裏淺深服之皆驗  
藥材與右剉散每服三錢薑五厚片棗二  
局方同枚水盞半煎一盞溫服恍惚加白茯苓骨  
節煩疼素有熱去附子倍芍藥煩燥大便  
秘去附子倍芍藥加竹瀝大便利素有寒  
去黃芩加白朮附子骨肉冷疼加薤桂附  
子嘔逆腹脹加人參半夏自汗去麻黃加  
芍藥大便結熱去附子加枳殼大黃痰多

加南星炮切數片風虛加當歸渴加括蕒

根身疼加秦艽喘急加炒桑白皮嚴氏濟

生方治證與千防已麻黃去根節人參桂

心不見黃芩甘草炙白芍藥杏仁湯浸去

芎藭各一附子炮去皮防風去蘆一右咬

咀每服四錢水一盞半生姜七片棗兩枚

煎至七分去滓溫服不拘時候恍惚者加

茯神遠志骨節煩疼本有熱者去附子加

秦艽一兩管見大全良方治證及服法與簡易方同藥材

與濟生得効方加減續命湯治證與麻黃

去人參黃芩白芍藥川芎甘草杏仁去皮

防已桂各二防風一兩附子炮去皮附

子右剉散每服四錢水一盞半生薑三片

棗二枚煎不拘時候溫服取汗隨人虛實

與所中輕重也筋急拘攣語遲脉弦加蒼

苳仁治筋急加人參黃芩芍藥以避中寒

服后稍輕再加當歸全愈脚氣痺弱不能

轉側心神恍惚加茯神遠志骨節煩疼有

熱者去附子倍加芍藥煩燥大便澁去附子倍芍藥加竹瀝臟寒大便自利去黃芩加白朮附子骨肉冷痛者加肉桂附子煩燥多驚者加犀角嘔逆腹脹人參半下自汗去麻黃語言蹇澁手足顛掉石菖蒲竹瀝大便秘胸中不快枳殼大黃氣塞不通沉香有痰南星數片發渴麥門冬乾葛瓜根身疼秦艽上氣浮腫喘急防風桑白皮以上所加各一兩小兒慢驚煎取藥汁一

盞入生薑汁再煎一二沸日三服夜二服夏間又有熱者減桂一半春加麻黃一兩夏加黃芩一兩秋加當歸四兩冬加附子半兩風虛加川芎一兩一方加木香縮砂獨活各一兩川烏炮三分亦效牙關緊用南星末半錢龍腦一字頻擦牙上令熱即自開永類鈴方治證與局方同防風去蘆乙兩半麻黃湯泡防己人參黃芩桂心杏仁去皮尖炒白芍甘草炙川芎各乙兩附子炮半兩一方去附

子加木香南星以通氣右咬咀每半兩水  
盞半姜五片棗一个煎七分熟服無時簡  
易集加減同此方出仲景古方桂枝麻黃  
各半湯加防風是防風爲君去麻黃似失  
立方本意矣此方古今治風良方喜發汗  
亡血偏枯者又宜養血更兼通氣藥兼服  
如前順氣散必成功矣又此方以防風爲  
君延年去防風恐無義理臞仙活人心通  
治八風五痺痰癩等疾以一歲爲總六經

爲別藥內隨證細分加減自古名醫不能

越此

藥材與局方同

右除附子杏仁外搗爲麤末

後入二味勻每服五錢水一鍾半生姜五  
片煎至一鍾去粗稍熟食前服無附子防  
風生姜有當歸一兩春加麻黃一兩夏加  
黃芩七錢秋加當歸四兩冬加附子半兩  
精神恍惚加茯神遠志骨節煩痛有熱者  
去附子倍芍藥心煩多驚者加犀角半兩  
骨間冷痛者倍用桂附嘔逆腹脹者倍人

參加半夏一兩燥悶大便澁者去附子倍  
 芍藥入竹瀝一合煎服臍寒下利者去防  
 已黃芩倍附子一兩加白朮一兩便利產  
 後失血并老人小兒加麻黃桂心甘草各  
 二兩治或歌哭或笑語無所不及用麻黃  
 人參桂枝白朮各三兩自汗者去麻黃杏  
 仁加白朮脚弱加牛膝石斛各一兩身疼  
 痛加秦艽一兩腰疼加桃仁杜仲各半兩  
 失音加杏仁一兩御醫撮要治證與麻黃局方同

去根防已人參去蘆黃芩桂心去麤皮附子  
炮去甘草剉芍藥芎藭杏仁去皮尖炒防  
皮風去蘆頭生薑五兩右十二味以水九升煮  
 取三升分三服不差更合三四劑必佳取  
 汗隨人風輕重虛實若要為散除附子杏  
 仁生姜外合搗麤末後入附子杏仁令勻  
 每三錢水一盞半入生姜五片煎至一盞  
 去滓稍熱服食前  
 小續命湯治中風冒昧不知痛處拘急不得

轉側四肢緩急遺失便利此與大續命湯同  
偏宜產後失血并老小人

麻黃 桂心 甘草各二兩 生薑五兩 人參

芎藭 白朮前方有杏人 附子 防已 芍藥

黃芩各一兩 防風半兩

右十二味咬咀以水一斗二升煮取三升

分三服古今錄驗無桂心名續命湯胡洽

千金翼同

又方治風歷年歲或歌或哭或大笑言語無

所不及方

麻黃三兩 人參 桂心 白朮各二兩 芍藥

甘草 防已 黃芩 芎藭 當歸各一兩

右十味咬咀以水一斗二升煮取三升分

三服日三覆取汗

大續命湯治肝厲風卒然瘖啞依古法用大

小續命二湯通治五藏偏枯賊風方

麻黃八兩 石膏四兩 桂心 乾薑 芎藭各二兩

當歸 黃芩各一兩 杏人三十枚 荆瀝一升

右九味咬咀以水一斗先煮麻黃兩沸掠去沫下諸藥煮取四升去滓又下荆瀝煮數沸分四服能言未瘥後服小續命湯舊無荆瀝今增之效如神千金翼有甘草又方治大風經藏奄忽不能言四肢垂曳皮肉痛癢不自知

獨活 麻黃各三兩 芎藭 防風 當歸

葛根 生薑 桂心神巧葛全方已上六味各二兩 茯苓

附子 細辛 甘草各一兩

右十二味咬咀以水一斗二升煮取四升分五服老小半之若初得病便自大汗者減麻黃不汗者依方上氣者加吳茱萸二兩厚朴一兩乾嘔者倍加附子一兩腕者加橘皮二兩若胃中吸吸少氣者加大棗十二枚心下驚悸者加茯苓一兩若熱者可除生薑加葛根初得風未須加減便且作三劑停四五日已後更候視病虛實平論之行湯行針依穴灸之

又方治與前大續命湯同宜產婦及老小等方

麻黃 芎藭各三兩 乾姜 石膏 人參

當歸 桂心 甘草各二兩 杏仁四十枚

右九味咬咀以水一斗煮取三升分三服

外臺名續命湯范注同云是張仲景方本

欠兩味

大續命散治八風十二痺偏枯不仁手足拘急疼痛不得伸屈頭眩不能自舉起止顛倒

或臥苦驚如墮地狀盜汗臨事不起婦人帶

下無子風入五臟甚者恐怖見鬼來收攝或

與鬼神交通悲愁哭泣忽忽欲走方

麻黃 烏頭 防風 桂心 甘草 蜀

椒 杏仁 石膏 人參 芍藥 當歸

藜蘆翼作芎藭 黃芩 茯苓 乾薑各一兩

右十五味治下篩以酒服方寸匕日再後

加以知為度

續命煮散治風無輕重皆主之方

麻黃 芎藭 獨活 防已 甘草 杏

人各三兩 桂心 附子 茯苓 升麻 細

辛 人參 防風 各二兩 石膏 五兩 白木 四兩

右十五味粗篩下以五方寸匕內小絹袋

子中以水四升和生薑三兩煮取二升半

分三服日日勿絕慎風冷大良吾嘗中風

言語蹇澀四肢痿曳處此方日服四服十

日十夜服之不絕得愈

排風湯治男子婦人風虛濕冷邪氣入藏注

言妄語精神錯亂其肝風發則面青心悶亂

吐逆嘔沫脅滿頭眩重耳不聞人聲偏枯筋

急曲拳而臥其心風發則面赤翕然而熱悲

傷瞋怒張目呼喚其脾風發則面黃身體不

仁不能行步飲食失味夢寐倒錯與亡人相

隨其肺風發則面白欬逆唾膿血上氣奄然

而極其腎風發則面黑手足不遂腰痛難以

俛仰痺冷骨疼諸有此候令人心驚志意不

定恍惚多忘服此安心定志聰耳明目潤

腑諸風悉主之

白鮮皮 白朮 芍藥 嚴氏濟生方 桂心 濟生方

方不芎藭 當歸 濟生方 杏仁 濟生方 防

風 濟生方 甘草 各一兩 獨活 濟生方 麻

黃 濟生方 茯苓 各三兩 濟生薑 四兩

無 去根節 茯苓 生方 去皮 濟生薑 濟生方

右十三味咬咀以水一斗煮取三升每服一升覆取微汗可服三劑○濟生方右咬咀每服四錢水一盞半生姜七片棗兩枚

煎七分去滓溫服不拘時候服之微汗不

妨此藥大理榮血摧抑肝邪肝實有風脉

來浮實有力目赤脇疼口苦心煩錯語多

怒宜加羚羊角熱盛者加犀角肝虛有風

脉來浮虛無力當去麻黃加黃芪不能言

者加荆瀝和劑局方白茯苓 去皮 獨活 去麻

黃 去節 肉桂 去麤皮 白鮮皮 去

藟當歸 去蘆酒 防風 去蘆 白芍藥 甘草 炒

杏仁 去皮尖 白朮 各二 右為麤散

每服三錢水一盞半生薑四片同煎八分  
三因方得効方每服四錢水去滓溫服不  
 盞半姜七片棗二枚煎七分  
 計時候常服安心定志聰耳明目通臟腑  
 諸風疾並皆治之簡易方三法六門澹寮  
 方經驗良方玉機微義  
 同直指方治五臟風諸風亦治風毒脚氣  
 腫痛白鮮皮白朮白芍藥薤桂去麤皮當歸  
 川芎杏仁去麤尖防風甘草各二兩獨活麻  
 黃去節白茯苓各三兩右麤末每服二錢水盞  
 半薑四片煎一盞溫服醫方集成治中風

邪氣入於五臟令人狂言妄語精神錯亂  
 以至手足不仁痰涎壅盛茯苓去皮獨活去  
 蘆麻黃各三兩白鮮皮當歸去蘆防風去蘆芎藭白  
 朮甘草各二兩肉桂去粗皮杏仁去皮尖芍藥  
各一兩○永類鈐方右咬咀每服三錢水  
已上三味各二兩一盞鈐方半兩姜四片同煎溫服不拘時  
南北經驗方  
油珍方同  
 大入風湯簡易方治毒風頑痺痺曳手脚不  
 遂身體偏枯或毒弱簡易方不任或風入五

臟恍恍惚惚多語喜忘有時恐怖或肢節疼痛頭眩煩悶或腰脊僵直不得俛仰腹滿不食欬嗽或始遇病時卒倒悶絕即不能語便失瘖半身不隨不仁沉重皆由體虛恃少不避風冷所致治之方

當歸二兩 五味子 升麻各一兩半 烏頭黃芩  
芩 芍藥 遠志 獨活 防風 芎藭  
麻黃 秦艽 石斛 人參 茯苓 石  
膏 黃芪 紫苑各一兩 杏仁四十枚 甘草

桂心 乾姜各二兩 大豆一升千金翼云二合

右二十三味咬咀以水一斗三升酒二升合煮取四升疆人分四服羸人分六服○簡易方右咬咀每四錢水一盞半酒半盞同煎六分去滓服量人虛實加減服

八風散治八風十二痺猥退半身不遂歷節疼痛肌肉枯燥皮膚瞶動或筋緩急痛不在一處卒起目眩失心恍惚妄言倒錯身上瘡癩面上起疱或黃汗出更相染漬或燥或濕

顏色乍赤乍白或青或黑角弓反張乍寒乍熱方

麻黃 白朮 各一斤 羌活 二斤 黃芩 五兩 一斤 大黃

半斤 栝蔞根 甘草 欒荆 天雄 白芷

防風 芍藥 天門冬 石膏 各十兩 山茱

萸 食茱萸 躑躅 各五升 茵芋 十四兩 附子

三十枚 細辛 乾薑 桂心 各五兩 雄黃 朱

砂 丹參 各六兩

右二十五味治下篩酒服方寸匕初每日

一服三十日後日再五十日知百日瘥一  
年平復長服不已佳先食服

小入風散治迷惑如醉狂言妄語驚悸恐怖  
恍惚見鬼喜怒悲憂煩滿顛倒邑邑短氣不  
得語語則失忘或心痛徹背不嗜飲食惡風  
不得去帷帳時復疼熱惡聞人聲不知痛癢  
身悉振搖汗出猥退頭重浮腫爪不知痛頸  
項強直口面喎戾四肢不隨不仁偏枯攣掣  
不得屈伸悉主之方

天雄 當歸 人參各五分 附子 天門冬

防風 蜀椒 獨活各四分 烏頭 秦羌

細辛 白朮 乾薑各三分 麻黃 山茱萸

五味子 桔梗 白芷 柴胡 莽草各二分

右二十味治下篩合相得酒服半方寸匕

漸至一七日三服以身中覺如針刺狀則

藥行也

烏頭湯治八風五尸惡氣遊走胃心流出四

肢來往不住短氣欲死方

烏頭 芍藥 乾薑 桂心 細辛 乾

地黄 當歸 吳茱萸 甘草各二兩

右九味咬咀以水七升煮取二升半分三

服

藁耳散治諸風方當以五月五日午時乾地

刈取藁耳葉洗曝燥擣下篩酒若漿服一

方寸七日三作散若吐逆可蜜和為丸服

十九準前計一方寸匕數也風輕易治者

日再服若身體有風者皆作粟肌出或如  
麻豆粒此爲風毒出也可以鉞針刺潰去  
之皆黃汁出盡乃止五月五日多取陰乾  
之著大甕中稍取用之此草辟惡若欲有  
病省疾者便服之令人無所畏若時氣不  
和舉家服之若病胃脹滿心悶發熱卽服  
之并殺三蟲腸痔能進食一周年服之佳  
七月七九月九皆可採用○玉機微義右  
以葶耳葉曝燥爲末酒調服方寸七日三

若吐逆者蜜和爲丸服十九准前計一方  
寸七日三

治心風虛熱發卽恍惚煩悶半身不仁攣急  
方

荆瀝 竹瀝各五升 枸杞根白皮 生麥門

冬各一升 香豉三人合 茯苓 梔子人

黃芩 芎藭 桂心 細辛 杏人 防

風 白鮮皮各二兩 生薑 石膏 甘草各三兩

右十八味咬咀以水三斗和竹瀝荆瀝煮取三升分四服相去如人行六七里凡五劑間三日服一劑一用防已三兩

治虛熱恍惚驚邪恐懼方

荆瀝三升竹瀝二升香豉三合牛黃十八銖生麥門

冬人參各三升麻升鐵精升天門冬

龍齒茯苓梔子各二兩

右十二味咬咀以水二斗煮取三升去滓下牛黃鐵精更煎五六沸取二升七合分

五服溫服相去十里久

地黃煎治熱風心煩悶及脾胃間熱不下食

冷補方

生地黄汁 枸杞根汁二升生薑汁 酥各三升

升荆瀝 竹瀝各五升天門冬 人參各八兩

茯苓六十兩梔子各四兩

右十一味搗篩五物為散先煎地黃等汁成煎次內散藥攪調每服一匕日再漸加至三七覺利減之

又方黃芩 乾藍 芍藥 鼠尾草各三兩 梔  
 子人 生葛各六兩 羚羊角五兩 鼓綿裹一升  
 右八味咬咀以水七升煮取二升五合分  
 三服

治積熱風方

地骨皮 萎蕤 丹參 黃芪 麥門冬  
 澤瀉各三兩 清蜜 薑汁各一合 生地黃汁一升  
 右九味以水六升煮取二升去滓內地黃  
 汁更緩火煮減一升內蜜及薑汁又煮一

沸藥成溫服三合日再

大防風湯治中風發熱無汗肢節煩腹急通  
 大小便不利

防風 當歸 麻黃 白朮 甘草各十銖  
 黃芩三十銖 乾地黄 山茱萸 茯苓 附  
 子各一兩

右十味咬咀以水九升煮取二升半一服  
 七合大小便不利內大黃人參各十八銖  
 大棗三十枚生姜三兩煮取三升分三服

深師加天門冬一兩

大戟洗湯治中風發熱方

大戟 苦參 各等分

右二味為末以藥半升白酢漿一斗煮三沸適寒溫洗從上下寒乃止立瘥小兒三指撮許漿水四升煮洗之

金牙酒療積年八風五疰舉身羸曳不得轉側行步跛躄不能收攝又暴口噤失音言語不正四肢背脊筋急腫痛流走不常勞冷積

聚少氣乍寒乍熱三焦不調脾胃不磨飲滯結實逆害飲食醉咽嘔吐食不生肌醫所不能治者

金牙 碎如米粒用 地膚子 無子用莖蘇乾

地黃 蒴藿根 附子 防風 細辛

莽草 各四兩 蜀椒 合四 羌活 一斤胡洽

右十味以咀盛以絹袋用酒四斗於瓷罈中漬密閉頭勿令洩氣春夏三四宿秋冬六七宿酒成去滓日服一合此酒無毒及

可小醉常令酒氣相接不盡一劑病無不  
愈又令人肥健酒盡自可加諸藥各三兩  
惟蜀椒五兩用酒如前勿加金牙也冷加  
乾薑四兩服此酒勝灸刺起三十諸風韠  
曳神驗肘後備急用升麻乾姜各四兩人  
參二兩石斛牛膝各五兩不用藿蒭根爲  
十四味蘇恭不用地黃爲十三味一方用  
蒺藜四兩黃芪三兩胡洽用續斷四兩爲  
十一味千金翼用茵芋四兩無菴草○聖

惠方治積年八風五注舉身躄曳不得轉  
側行步跛躄不能收攝又暴中風口噤失  
音語不通利四肢筋脉皆急毒風起流走  
無常處宜服金牙浸酒方金牙擣細辛地  
膚子乾薑炮裂熟乾地黃附子炮裂去防  
風去蘆茵芋川椒去目蒟蒻根各四兩羌活一斤  
右件藥細剉以生絹袋盛用清酒三斗於  
甕中漬之密泥封勿泄氣春夏三四日  
秋冬六七日開每溫服一小盞常令醺醺

然此酒無毒亦可小醉不盡一劑病無不愈又令人肥健矣

常山太守馬灌酒除風氣通血脉益精華定六腑聰明耳目悅澤顏色頭白更黑齒落更生服藥二十日力勢倍六十日志氣充盈八十日能夜書百日致神明房中強壯如三十時力能引弩年八十人服之亦當有子病在腰膝藥悉主之

天雄二兩商陸根 躑躅 蜀椒各一兩烏

頭一枚附子五枚桂心 白斂 茵芋 乾

薑各三兩

右十味咬咀以絹袋盛酒三斗漬春夏五日秋冬七日去滓初服半合稍加至兩三合擣滓為散酒服方寸七日三以知為度夏日恐酒酸以油單覆之下井中近水令不酸也千金翼無商陸桂心為八味蠻夷酒治久風枯癩三十年著床及諸惡風眉毛墮落方

乾地黄 獨活 丹參 礬石 各一兩 麥門

冬 附子 甘遂 各二兩 赤石脂 二兩 乾薑

蕪荑 芫花 栝子 各一合 蘇子 一升 菴蓉

茯苓 翼作茯苓 金牙 薯蕷 白朮 杜仲

石南 牡荊子 山茱萸 欬冬 各十銖 白

芷 烏喙 烏頭 人參 狼毒 蜀椒

防風 細辛 礬石 寒水石 牛膝

麻黃 芎藭 當歸 柴胡 芍藥 牡

蠣 桔梗 狗脊 翼作杞枸 天雄 各半兩 石斛

桂心 各六銖

右四十五味 咬咀以酒二斗 漬夏三日 春

秋六日 冬九日 一服半合 密室中 合藥勿

令女人六畜見之 三日清齋 乃合 千金翼

無芎藭云加大棗四十枚更佳

又方治八風十二痺 偏枯不隨 宿食久寒 虛

冷五勞七傷及婦人產後餘疾 月水不調 皆

主之方

礬石 桂心 白朮 狼毒 半夏 石

南 白石脂 龍膽 續斷 芫花 白  
 石 英 代赭 藺茹 石韋 玄參 天  
 雄 防風 山茱萸 桔梗 藜蘆 卷  
 栢 細辛 寒水石 烏頭 躑躅 蜀  
 椒 白芷 秦艽 菖蒲 各一兩 礬石 附  
 子 遠志 各二兩 石膏 二兩 蜈蚣 一  
 右三十四味咬咀以酒二斗漬四日每服  
 一合日再十日後去滓曝乾精節為散酒  
 服方寸匕日再以知為度胡洽四十二味

無桂心細辛烏頭躑躅蜀椒而有菘消恒  
 山黃芩黃連大黃麻黃地黃前胡甘草菟  
 絲子芍藥紫菀各一兩杏仁一十枚同搗  
 篩絹袋盛用水三斗麴三斤黍米三斗作  
 飯依釀酒法以藥袋置釀中春秋七日冬  
 十日夏三日酒成服半雞子殼日三服曝  
 藥為末酒服方寸匕以身體暖為度  
 魯王酒治風眩心亂耳聾目暗淚出鼻不聞  
 香臭口爛生瘡風齒癩癰喉下生瘡煩熱厥

逆上氣脅脊肩胛痛手不能上頭不能帶衣  
 腰脊不能俛仰脚酸不仁難以久立八風十  
 二痺五緩六急半身不遂四肢偏枯筋攣不  
 可屈伸賊風咽喉閉塞哽哽不利或如錐刀  
 所刺行人皮膚中無有常處久久不治入入  
 五臟或在心下或在膏肓遊走四肢偏有冷  
 處如風所吹久寒積聚風濕五勞七傷虛損  
 百病悉主之方

茵芋 烏頭 躑躅 各三 天雄 各十 防已

石斛 二十 細辛 牛膝 甘草 栢子人

通草 桂心 秦艸 茵陳 山茱萸

黃芩 胡洽作黃耆 附子 瞿麥 乾地黃 王

不留行 胡洽作千金翼作天門冬王蓀 杜仲 澤瀉 石

南 防風 遠志 各十

右二十五味咬咀以酒四斗漬十日每服

一合加至四五合以知為度千金翼名此

為魯公酒有乾薑胡洽無防已以絹囊盛

藥用水二斗法麴二斤同漬三四宿出藥

囊炊三斗黍米內汁釀之酒熟飲如雞子  
大日三服稍稍飲之以知為度

又方治風偏枯半死行勞得風若鬼所擊四  
肢不遂不能行步不自帶衣攣臂五緩六急  
婦人帶下產乳中風五勞七傷

- 乾薑 躑躅 桂心 甘草 芍藥 續斷 細辛 附子 秦艽 天雄 石膏
- 紫苑各五兩 葛根 通草 防風 栝子人
- 巴戟天 石斛 石南 山茱萸 石龍

- 芮四兩 天門冬 牛膝各八兩 烏頭二十 蜀椒半升

右二十五味以水五升漬三宿法麴  
一斤合漬秫米二斗合釀三宿去滓炊糯  
米一斗醞三宿藥成先食服半合日再待  
米極消盡乃去滓曝乾末服

獨活酒治八風十二痺方

- 獨活 石南各四兩 防風三兩 附子 烏頭
- 天雄 茵芋各二兩

右七味咬咀以酒二斗漬七日每服半合  
 日三以知為度○聖惠方獨活四兩石南四兩  
 防風三兩去蘆頭茵芋附子炮裂去川烏頭炮裂  
 去皮天雄炮裂去桂心牛膝去苗已上右  
 件藥細剉以生絹袋盛用好酒二斗漬經  
 七日每日隨性溫飲一小盞勿令大醉以  
 効為度

賊風

桂枝酒治肝虛寒卒然痛啞不聲躄坐不得

面目青黑四肢緩弱遺失便利厲風成損方

桂枝 芎藭 獨活 牛膝 薯蕷

甘草各三兩附子二兩防風 茯苓 天雄

茵芋 杜仲 蒟蒻根 白朮各四兩乾薑

五兩大棗四十枚躑躅 猪椒葉根皮各一升

右十八味咬咀以酒四斗漬七日每服四

合日二加至五六合

大定心湯治心氣虛悸恍惚方見驚悸門

乾薑附子湯治心虛寒風半身不遂骨節離

解緩弱不收便利無度口面喎邪方

乾薑 附子各八兩 桂心 麻黃各四兩 芎藭

三兩

右五味咬咀以水九升煮取三升分三服

三日後服一劑

側子酒治心寒或笑或呻口欬方見脚氣門

芎藭湯治卒中風四肢不仁善笑不息方

芎藭一兩半 黃芩 石膏用黃連 當歸 秦艽

麻黃 桂心 乾薑 甘草各一兩 杏仁十二

一枚

右十味咬咀以水九升者取三升分三服

荆瀝湯治心虛寒陰氣傷寒損心驚掣悸語

聲寬急混濁口喎冒昧好自笑厲風傷心方

荆瀝三升 母薑取汁一升 麻黃 白朮 芎藭各四

防風 桂心 升麻 茯苓 遠志

人參 羌活 當歸各三兩 防已 甘草各二

右十五味咬咀以水一斗五升煎麻黃兩

沸去沫次下諸藥煮取三升去滓下荆瀝  
 薑汁煎取四升分四服日三夜一  
 白朮酒補心志定氣治心虛寒氣性反常心  
 手不隨語聲冒昧其疾源厲風損心具如前  
 方所說無窮

白朮切地骨皮

荆實各五斗菊花三斗

右四味以水三百煮取一石五斗去滓澄  
 清取汁釀米二石用麴如常法酒熟隨能  
 飲之常取半醉勿令至吐

依源麻黃湯治脾虛寒厲風所傷舉體消瘦  
 語音沉澀如破鼓聲舌強不轉而好咽唾口  
 噤脣黑四肢不舉身重如山便利無度方關  
 半夏湯溫中下氣治脾寒語聲憂懼舌本捲  
 縮嗔喜無度昏悶恍惚脹滿方

半夏 大麻人為煎生薑各一升芍藥 茯苓

苓 吾味子 桂心 橘皮各三兩白朮四兩

附子五兩甘草二兩大棗三十枚

右十二味咬咀以水一斗二升煮取三升

去滓下大麻人脂更上火一沸分三服  
當歸圓補脾安胃調氣止痛治脾虛寒身重  
不舉語音沉鼓厲風傷痛便利無度方

當歸 酸棗人 乾薑各八兩 芎藭 乾地

黃 天雄各六兩 地骨皮 黃耆各七兩 大棗

二十枚 吳茱萸五合 甘草 秦椒葉 厚朴

秦艽各四兩 桂心 防風 附子 白朮各五兩

右十八味為末蜜丸如梧子酒服三十九

加至四十九日再服

依源麻黃續命湯治肺虛寒厲風所中噓吸  
戰掉聲嘶塞而散下氣息短憊四肢痺弱面  
色青葩遺失便利冷汗出

麻黃六兩 大棗五十枚 杏仁 白朮 石膏各四兩

兩 桂心 人參 乾薑 茯苓各三兩 當歸

芎藭 甘草各二兩

右十二味咬咀以水一斗二升煮麻黃去  
沫次下諸藥煎取三升去滓分三服舊方

無术茯苓今方無黃芩轉以依經逐病增損

八風防風散治肺寒虛傷語音嘶下拖氣用力戰掉緩弱羸瘠厲風入肺方

防風 獨活 芎藭 秦椒 乾薑 黃

者 附子二十四銖 天雄 麻黃 石膏 五

味子 山茱萸各三十銖 秦艽 桂心 薯

蕷 細辛 當歸 防已 人參 杜仲

各三銖 甘草十二銖 貫衆 紫苑十二枚 甘菊二枚

右二十四味治下節每服方寸匕酒調進

至兩七日再

溫中生薑湯治肺虛寒羸瘦緩弱戰掉噓吸胃滿肺痿方

生薑一斤 桂心 橘皮四兩 甘草 麻黃三兩

右五味咬咀以水一斗煮取二升半分三服先煎麻黃兩沸去沫然後入諸藥合煮

腎瀝湯治腎寒虛為厲風所傷語音蹇吃不轉偏枯胣脚偏跛蹇緩弱不能動口喎言音

混濁便利仰人耳偏聾塞腰背相引隨病用藥依源增損方

羊腎具黃者 芎藭 桂心 當歸 人

參 防風 甘草 五味子 三兩○得効方各乙兩

玄參 茯苓 芍藥 各四兩○得効方各乙兩二錢半 磁

石 五兩○得効方一兩七錢 地骨皮 二升切○得効方五錢 生薑

八兩○得効方二兩 右十五味咬咀以水一斗五升煮羊腎取

七升下諸藥取三升去滓分三服可服三

劑○得効方右剉散以水一斗煮羊腎取

五升下諸藥取二升分三服服茵芋酒治耳聾口欬等病 方見脚氣門

乾地黃圓治腎虛呻吟喜恚怒反常心性陽氣弱腰背彊急髓冷方

乾地黃 山茱萸 天門冬 桂心 續

斷 各一兩半 柏子人 杜仲 牛膝 菴蓉 四

銖 茯苓 天雄 鍾乳 各二兩 松脂 遠志

乾薑 各三銖 菖蒲 薯蕷 甘草 各一兩

右十八味末蜜丸梧子大酒服三十九日  
二加至四十九

大巖蜜湯治賊風腹中絞痛并飛尸遁注發  
作無時發即捨心脹滿脅下如錐刀刺并主  
少陰傷寒方

梔子十五枚 甘草 乾地黄 細辛 羊脂

青羊角亦得 茯苓 吳茱萸 芍藥小品用芎藭 乾

薑 當歸 桂心各一兩

右十一味咬咀以水八升煮取三升去滓

內脂令烊分三服溫服相去如人行十里

頃若痛甚者加羊脂三兩當歸芍藥人參

各一兩心腹脹滿堅急者加大黃三兩胡

洽不用梔子羊脂茯苓桂心名巖蜜湯

小巖蜜湯治惡風角弓反張飛尸入腹絞痛

悶絕往來有時筋急少陰傷寒口噤不利方

大黃二兩 雄黃 青羊脂各一兩 當歸 乾薑

桂心 乾地黄 芍藥 甘草 細辛各

兩 吳茱萸三兩

右十一味咬咀以水二斗煮取六升分六服重者加藥用水三斗煮取九升分十服排風湯治諸毒風邪氣所中口噤悶絕不識人及身體疼煩面目手足身腫者方

犀角 貝子 升麻 羚羊角 各一兩

右四味治下篩為粗散以水二升半內四方寸匕煮取一升去滓服五合殺藥者以意增之若腫和雞子傅上日三度老小可斟酌加減神良亦可多合備用

烏頭湯治寒疝腹中絞痛賊風入腹攻五臟拘急不得轉側呌呼發作有時使人陰縮手足厥逆方

烏頭 十五枚要 大棗 十枚 甘草 二兩 芍藥 四兩 桂心 六兩 薑 一斤

右六味咬咀以水七升煮五味取三升去滓別擣烏頭去皮四破蜜二升微火煎令減五六合內湯中煮兩小沸去滓服一合日三間食彊者三合以如醉狀為知不知

增之

治賊風所中腹內攣急方

麻黃

四兩

甘草

尺一

石膏

鬼箭羽

各雞

子大

右四味咬咀以東流水二升煮取一升頓

服之

醫方類聚卷之十四